

celebrant. In editione systematis Tui Lipsiensi, denominatio Generis 152: Coccinella translatori ad lepidum errorem occasionem dedit, accipiendi speciem primam pro Cochinella scarlatinum colorem præbente. Chrysomelas me cognoscere credo, sed quid per antennas moniliformes earum intelligendum sit scire amem. Idem translator, ni fallor, Cel. Hebenstreit, Prof. Lips. genus 158 Mordellarum pro Notonecta suscepit et in Wasserwanze (Cimex aquaticus) transtulit; Vt et Cicindelas Tuas in leuchtende Käfer (Noctilucas). Miror ipsum non etiam Cantharides in spanische Fliege (Cantharides officinar.) transtulisse, de quibus ipse tamen non satis certus sum, num Tu eas ad genus Cantharidum officinarum retuleris; olim Halæ per vnicum modo diem in syringa maximo numero hospitantes vidi. Num Leptura a λεπτός et ἑρὰ? num Necydalis quasi mortuos lædens? et quale illud insectum antiquis probabiliter fuerit? Vnde Aphis? num forsitan ex Ἀφία? Vnde Thrips, Panorpa, Tenthredo et Cynips? Ex Te scire amem. Ne detrectes agere Professoris Professorem. Ne objicias talia discipulis Tuis esse nota. Volo enim etiam ex ea parte Tuus fieri et esse discipulus. Et licet conjecturando rem assequi possem, potius tamen mihi erit certitudinem eius ex fonte haurire. Insuper ex Te erogo, vbi figuræ Amphitrites, Tethyos, Nereid., Tritonis et Salaciæ inveniuntur ad Tuas quidem denominationes respondententes. Qualis inter cochleas Helix et Fistula? inter Dentalia Penicillus? inter Nautilus Lithuus? inter conchas Buccardium? cum nulla citatio rem indigitans ad hæc nomina adsit; Quorsum referas Nautilum tenuem, papyraceum vnilocularem? Plura hæc sunt, quam in vna lectione exspectare queam. Omnia vero otiosis Tibi quibusdam, vel saltem minus laboriosis, momentis relinquo.

Ex pagellis simul ad Te missis laboris mei præsentis specimen conspicias, cuius conditionem, quoad icones conchyliorum naturalibus coloribus pictas excellentem, D. Pr. Friis tamquam autoptes fusius indicabit. Quod ad meam partem huius operis attinet, non possum quidem iure ab vlllo Naturalistarum, minime a Tuæ perspicaciæ Viro favens exspectare iudicium, cum ipse fateor me demum tironem in hoc studio